

木瀆小志卷三

人物四

文學

漢

朱買臣字翁子吳人也家貧好讀書常艾薪樵買以給食擔束薪行且誦書其妻羞之求去後數歲買臣隨上計吏至長安待詔公車會邑子嚴助貴幸薦買臣召見說春秋言楚辭武帝甚悅之拜為中大夫與嚴助俱侍中時東越反覆買臣請發兵討之遂拜會稽太守到郡治樓船並受詔將兵與橫海將軍韓說俱破東越有功徵入為主爵都尉列於九卿

漢書

木瀆小志

卷三

一

蘇州觀前街利蘇印書社承印

唐

殷懌字易從曲阿人少負志氣博學善屬文弱冠遊太學籍甚公卿間天寶末知天下將亂乃促裝東歸居吳郡訪得遠祖文成公廢隴在吳郡香山因結廬焉吳中士大夫得從之遊者鄉黨以為榮采訪使李希言辟為從事保授崑山尉不就卒子侑

遂顯宦

府志流寓參家乘按殷氏譜宋文帝時殷景仁為尚書僕射劉湛結彭城王義康欲傾之景仁懼禍及託言

采藥結廬吳郡香山有終焉之志時元嘉十三年也尋以朝旨敦促不已仍還建康十七年卒贈司空諡文成賜葬香山給采田六頃守冢六十家世祖大明五年詔改葬丹陽故吳中為廢壟今小晏嶺南有殷將軍墓龜石俱沒荒草中俗名殷家府懌所居蓋其地也

宋

李育字仲蒙堯峯人性高潔能詩文嘗賦合肥飛騎橋詩膾炙人口登皇祐元年進士未仕歸得郁氏廢圃於橫山嶺下種梅盈千日吟咏其中橫山志又有孫起卿木瀆人紹興五年進士吳郡志

顧禧字景繁吳人祖沂知龔州父彥成兩浙轉運副使皆有賢名禧雖受世賞不求仕進先居光福山中著書與吳興施元之並註蘇詩紹興中郡以遺逸薦閒居不出者五十年後築室穹隆之邳村表曰漫莊自號癡絕叟讀書終老鄉人貴重之府志

楊基字孟載其先蜀人祖官吳中生基遂家焉九歲背誦六經

及長著書十餘萬言名曰論鑒遭亂隱吳之赤山張士誠辟爲丞相府記室明洪武中累官至山西按察使被讒奪官謫輸作竟卒於工所初會稽楊維禎客吳中以詩自豪基於座上賦鐵笛歌維禎驚喜與俱東語從遊者曰吾在吳又得一鐵矣若曹就之學優於老鐵學也後與高啓張羽徐賁齊名時稱爲四傑明史吳中詩壇此爲最盛猶弘正文徵明主持風雅與唐寅祝允明徐禎卿同爲吳中四才子也

殷褒字伯揚世宅香山洪武中官嘉興教授始居木瀆鎮之東子三人幼暉字叔冠永樂癸未舉人甲申進士官彭澤教諭先是

褒叔父奎爲崑山咸陽兩教諭至暉已三世矣故時稱爲殷學官之家同里談和字彥和永樂戊

子舉人博綜經史子孫累奕青衿遂爲瀆中望族與殷氏並稱

焉

劉昌字欽謨雁蕩村人少穎敏過目成誦弱冠中正統九年鄉試第一明年會試第二對策忤執政抑置二甲景泰二年授南京工部主事歷員外郎中出爲河南提學副使遷廣東左參政丁內外艱服闋卒於家所著有胥臺鳳臺金臺嵩臺越臺五集及中州志等別見藝文子嘉綰亦工詩文早夭遺腹子稚孫以書畫名號七芝居士

按雁蕩村有三鄉廟在十一都二十一圖故采入本志非借才也

顏璋字廷用峯粵山下人幼涉獵經史長辟爲吏正統間赴都考最官上饒新淦二縣在任十餘年廉平任事嘗捐俸代貧民輸糧天順初引年致仕隱楓橋西自號稼軒老人

縣志

楊循吉字君謙郡人成化甲辰進士授禮部主事乞改教職不允遂致仕年僅三十家居七載會詔求直言乃上封事請復建文帝年號不報結廬支硎南峯讀書其中因以爲號

徐禎卿有楊氏南峯

隱居贊

復奉詔舉隱逸臺省以薦辭不應年八十九卒著有吳中

往哲記金山志倚玉集等書

明史及府縣志

袁袞字永之郡人嘉靖乙酉解元連登進士第廣西提學僉事謝病歸隱居橫塘別業有湖山之勝又築黃山草堂自號曰胥臺山人閉戶讀書足跡不入城惟與文徵仲王履吉諸老往來徵仲題其門曰宅近青山同謝朓門垂碧柳似陶潛有集二十卷陸師道序謂少時接文祝之清芬挹唐王之膏馥沈思孤詣

日進不已故著作粲然云

府縣志  
參文集

朱臣字伯升橫塘人弘治壬子舉人正德甲戌始舉禮部丁丑廷對賜進士臣精於義理之學晚達不樂試官惟尚友古人若陸龜蒙范成大時或長嘯湖山欲起二賢而揖之

府志

同里錢鑄

字宗顏性孝謹家貧勵學領嘉靖甲午鄉薦庚戌成進士授光山知縣有聲倏念父母年高遂乞終養歸吳尋卒

縣志

趙榮字孟昌與祝允明盧雍袁袞爲友垂老開田園與諸賢日徜徉其中雍贈詩曰他年若說隱君子君是橫塘第一人允明以其勤稼政爲賦且耕之歌遂號且耕翁姪棟亦高士性近顛嘗以橫塘無紀載嘉靖末年采訪古今遺事成帙云

鄭若庸字中伯性妙悟早歲以詩名吳下年十六補縣學生三試皆首連入棘闈不售隱居橫山薦福塢及支硎山甕牖繩樞人過者指爲蝓蛭之居遂自號蝓蛭生殫精古文詞趙康王聞其名三聘乃起禮以上賓鄴人士徵文者無虛日程學士敏政以纁帛迎致都下嚴嵩父子聞其至請見不往又以鏹幣招幡然辭行仍如鄴爲王著書採掇古今奇事累千卷名曰類雋康王薨去趙居清源年八十餘卒著有蝓蛭集

府志

徐政字蘭谷世居跨塘少警敏智度過人年十三喪父綜家務區畫如成人及長推掌財賦事克善其任郡守王儀均八邑田委令履勘鄉人賴之所居有凝翠樓與文徵明王寵輩結吟社

於此子言孫思仁均有孝行曾孫如珂爲名臣

橫山志 言嘗  
修西跨塘橋思

仁當倭變時練團保衛  
鄉里悉出已貲不少惜

潘袤字修伯木瀆人少師王寵爲府學生工古文詞

縣志

同宗有

潘叙潘煉各以行義著敍世居香山東麓自號半巖祖懷德始

建宗祠敍能承先志遵朱子家禮以合族人博學好古仗義疏

財與都穆文祝諸公游

香山潘氏祠堂記卽  
祝允明撰文徵明書

歲大水敍盡出其

粟千石貸鄉人曰明年有秋幸相償或難之則曰是皆嘗佃吾

田者豐年吾食其力凶則棄之不忍也鄉人感其德明年果子

本俱償

文徵  
明傳

子景銀諸生官雲南呈貢縣鄭藩右史致仕煉世

居穹窿毗村喜周卹貧困多逸事

互見  
雜誌

沈濤字惟淵木瀆人性穎敏饒有膽量掌鄉賦公平民樂輸納  
有司知其能如均羨田立義倉皆仰濤規畫處置倭夷入寇濤  
練鄉兵設方略屹然保障時各鎮多殘破而木瀆無恙濤之力  
也其後有沈魯字希曾亦木瀆人博學善屬文受知於申文定  
時行爲忘年交多所倡和

縣志

張訓字道輔家於胥谷嘉靖辛卯舉人與文壽承休承昆季爲  
莫逆交晚任建甯通判分兵防倭會郡城有寇當事者檄令守  
禦時軍民錯居廛市龐雜訓以寬和得衆心賊始退兼攝崇安  
篆以惠政得民旋告歸徜徉山水以終范惟一誌其墓子有光  
能詩著有江南詩稿孫敏事鄉飲介賓

殷建中字敏齋居瀆西

褒弟襄之後

嘉靖辛酉舉人隆慶戊辰進士

官工部郎中子獻臣字汝劼長洲諸生尚氣節少與周順昌朱陛宣同學友善一時人望有五奎之目及順昌被逮獻臣奔走

周旋又與沙舜臣王節劉羽儀文震亨等面斥巡撫毛一鷺一

鷺嫚應之會緹騎訶叱激衆怒遂有羣擊之事獄興具僂顏佩韋等五人而諸生俱被黜崇禎初得解獻臣舉鄉飲介賓嘗輯

周吏部年譜一卷國變後不食死鄉人私諡孝終先生

府志參家乘

其同族有國俊字心抑諸生疏財好義卽爲故友馮怡泉遺金

構作井亭者

嘗與從孫麗同修宗譜麗字羽青有文名屈翁山梁藥亭皆與之友善

黃習遠字伯傳世居木瀆山塘工詩古文好山水遠遊著有蕭

齋稿黃山紀遊朝鮮史略萬曆季年請於權部馬之駿爲靈巖贖山見厄鄉人走白下仍搜輯古今題詠及諸遺跡爲靈巖山志八卷志成而伯傳死寄櫬他方客至爭以詩哭之同里朱應佐宸卿工眞草書與朱鷺趙宦光輩相倡和著有井蛙草

縣志鍾

士奇靈巖山人幼有遠志數歲能屬文閱史傳慕諸葛亮仿其木牛流馬之法盤走几上或見謂不祥遽毀之試輒高等不售志愈奮雖不得遇而師模文行見重於時爭延致之親友知其貧多餽遺者怫然起置道旁或投之水曰吾豈受人憐者耶嘗因催科急質衣得一金赴納遽遺之撫掌大笑人謂曰君失金何樂乃爾士奇曰吾爲得金者樂也其襟期灑落如此年七十

餘卒縣志

馮翼字二有木瀆人殷心抑弟子與同里沈建殷明試諸人友  
木瀆詩存稿載有井亭詩  
三人坐法鏡山房唱和詩著瀆上篇四卷崇禎吳縣志多采取  
其書今佚

徐鳴時字君和橫塘人少遊縣學喪父赤貧寄食蕭寺為句讀  
師藉修脯以供母人高其行室隘不能容隙地構室顏曰雙學  
取宋人老夫稼圃雙方學之句崇禎乙亥以選貢除武甯知縣  
有善政卒於任門人私諡貞隱先生著有橫溪錄八卷

清

汪琬字茗文號鈍庵長洲人少孤讀書五行俱下順治乙未進

士官戶部主事兵部司指揮多惠政未幾歸居堯峯胡巷九年  
閉戶著書康熙己未召試博學鴻詞授編修明史逾年仍假  
歸再居堯峯十二載而卒年六十七琬為文根柢六經出入廬  
陵震川間且因文見道務為經世有用之學嘗曰學問不可無  
師承議論不可無根據出處不可無本末生平淡於榮利難進  
易退自登仕籍前後閑居二十餘年泊然自樂也著有堯峯文  
集五十卷與侯朝宗魏叔子稱國初三家太學王咸中慕鈍翁  
名攜家入山築石塢  
山房卜鄰倡和繼而  
隨行入都湯斌稱之  
葉燮字星期吳江人父紹袁工部主事母沈宜修皆工詩五子  
三女並有文藻紹袁即天寥道人宜修字  
宛君三女紈意蕙網小鸞有午夢堂集行世燮

其幼子也康熙庚戌進士官寶應知縣罷歸燮天才卓犖萬言立就其論文以不蹈襲前人能自立言爲主論詩三訣曰生曰新曰深而以杜韓蘇三家爲宗晚居吳縣之橫山構小園曰獨立蒼茫處又有二棄草堂已畦小山叢桂諸題學者稱橫山先生沈德潛張錫祚顧嘉譽皆從受詩法巡撫宋犖重其名嘗減從往訪辭不見犖曰獨立蒼茫處容我一立否延佇久之乃去燮亦不往報也著有已畦文集三十卷玄孫嗣炳亦好詩馬泰始懷人絕句云詞貴清新意貴真論詩三要妙通神春風楊柳蘭舟渡試向橫山一問津自注又蘭爲橫山先生玄孫故以克承家學期之沈磐字石均木瀆人父建字孟侯明諸生能詩磐亦明諸生少爲文文肅磐母舅楊忠節所器重事母孝謹清初以詩名吳下與

尤西堂友善錢宮詹中諧其門人也

二人皆舉博學鴻詞科

著有宛陵吳

門香草垞等集沈德潛爲訂稿行世與同里張錫祚黃子雲盛錦稱靈巖四詩人年八十餘卒子學洙亦好學敦行族子峻字田尹以孝行稱爲母李請旌建坊康熙南巡召見嘉獎嘗從徐

乾學游有三徑亭詩集

清詩別裁中亦錄峻詩

蔣之材字石林清初木瀆人精岐黃工丹青深通琴理善鼓洞天箕山諸大曲張鷟庵秋水兄弟師事之後授經洞庭東山遂家焉

蔣溥字蒼存少號神童性傲岸隱居不仕而喜究地理陰陽之學著有清遠樓及秋燈夜雨山房詩名曰蘇臺集時又有夏溥



字于澗以善琴遊四方康熙二十八年南巡召見行在命鼓琴稱旨問何不至京師溥以親老對上嘉其孝弗強也

談汝龍字景鄰彥和後康熙乙亥南巡以諸生獻詩行在欽取入內廷纂修候選知縣鄉里榮之同時毛宗漢築槃隱草堂于硯山東嘯歌自得子曙字逸槎與沈德潛黃子雲諸人遊德潛爲作槃隱草堂記

黃子雲字士龍別號野鴻崑山籍居吳縣護村幼卽工詩稍長游輦下嘗偕編修徐葆光使琉球足跡所經南北萬里得風雲山水之助氣益壯詩益豪一時名動公卿有欲以鴻博薦者堅謝之嘗過鄒縣孟廟作詩有戰國風趨下斯文日再中之句庶

吉士鄒涇宿廟旁夢殿懸十字覺而記之乃知卽子雲句也初子雲執弟子禮於葆光一日葆光具衣冠下拜子雲稱先生曰向之抗顏以未見先生詩故也金壇王澍爲書長吟閣三字以贈子雲兼精書法與釋正誼相埒爲世所重族兄昇字若木號蕉亭與沈德潛友善著石鼓山房詩

盛錦字廷堅木瀆人諸生中年遨遊淮上馳騁燕臺已而應辟入蜀幕復北上淳郡王爲聘訓諸子居郡邸五載而歸所居處曰巖東草堂著有青樓詩集與同里張錫祚黃子雲齊名張以高古勝黃以雄傑勝盛以明麗勝者沈德潛彙訂其稿刊之章日照德潛外孫有靈巖三家詩選錦兄鈺字伯堅從弟璋字士莪亦

能詩

鈺有璞完詩草璋有省齋文鈔及香溪吟

後又有盛杲字硯樵善承家學著有

樂素軒詩及印譜

張鉞字少弋華亭人遷居瀆上布衣工詩與從兄鏞同爲葉橫山高弟著有鶴沙詩草鏞字朝鼎納生有楓巖遺草四子師愈師詠師載師軾並知名師詠字惕庵號劍洲府學廩生性端方不苟訾不苟笑動履必循蹈規矩然接物以和入其室者藹然如在春風中尤精理學凡先儒語錄俱能條舉而剖晰之師載字嘉猷乾隆辛酉舉人官鳳陽教諭有疏村詩稿

顧嘉譽字來章郡人績學著書離遠塵俗寓橫山下二十餘年所居曰澗西草堂凡遊覽所及多有記載成橫山志略六卷史

官徐葆光同學沈德潛序

周永銓字昇逸錢塘人更籍吳縣諸生修己自好如處子及發言爲詩逸情雲上直欲希風開寶年五十餘未肯見人沈德潛時一過訪談諧不倦至通籍後并不能一見矣時或議其爲僻爲矯德潛益重之著有東岡詩鈔

沈釗字勗存更名香祖木瀆諸生著靈巖新書十二卷乾隆十年南巡駕幸山寺沈德潛爲進呈御覽稱善又有殷愈字掌綸爲宋牧仲所識拔與顧嗣立儲大文汪份輩同學許璣字漢儀號蔗田徐士元字恕求號知隅並工詩

錢襄字思贊號訥生郡人師事徐葆光嘗寓木瀆與沈德潛友

善書法倂眞虞褚晚年益進奉贄幣造門者幾無虛日乾隆壬午南巡召試賜舉人授內閣中書著有百媿居士稿未刊又錢桓字士西橫金人爲德潛弟子詩學溫李有陶村詩稿其族浦莊人錢廷熊錢思元亦德潛入室弟子也

廷熊字荻薌乾隆戊午舉人官山東高密

長清荷澤各縣治聲卓著署濮州以母老乞養里居母喪幾於滅性時有孝子循吏之稱有餐霞閣詩集思元字宗上從歸愚學詩一意著述有吳門備乘十卷

張宗蒼字默存篁村人工山水用筆沈著以主簿銜河工效力乾隆十六年恭逢南巡獻畫冊取入畫院供奉十八年授戶部主事啓祥宮行走屢蒙賜第賜膳賜杖及福字貂裘年已七十尋告歸有篁村別墅在靈巖山下宗蒼所居也

見府志 宗蒼弟宗浚號鐵山

季弟河號秋槎並工詩見澣關志及木瀆詩存姪述渠字筠谷邑諸生亦善山水筆法蒼勁見畫徵錄 後有徐來

琛字小村諸生善丹青酷似篁村乾隆五十年冬供奉內廷賞賚稠疊

李炯字澹成號小樊元和人乾隆壬申進士官廣東茂名縣自題堂柱曰窮秀才做官何必十分受用活菩薩出世不過一點良心每聽訟平心察理以廉謹著去官日士民執香送者接踵有瞽百餘人製布袍獻炯瞽曰貧不得錦恐不當公意炯曰服之矣瞽前捫炯衣果布也則大喜舟過梅菴鎮商民設樂餞飲獻百金爲壽炯卻之已而昇炯徧歷鎮中曰公去矣俾鎮人一識公及歸卜居靈巖山下野服蕭然未嘗謁官府時與及門諸

子遨遊山水間年七十一著有古愚堂稿沈秋坪其弟子也彭啟

豐傳

沈祚昌字純如諸生自幼穎異嗜古文研討六經究心碑版金石其篆刻師顧苓陳炳隸楷亦工兄弟三人友愛無匹晚號虹橋居士時有黃孝錫號約圃亦工鐵筆爲光福徐堅舅氏堅嘗師事之二人並見飛鴻堂印人傳祚昌從子元龍字凌蒼號秋坪李炯弟子又受書法於伯父工眞草各書名在陸紹曾李福之間二人常寓瀆中遺墨亦多詩學唐賢格律深穩以貢生遊幕粵西十餘載著有度嶺編四卷歸後選瀆上諸家詩細加評定周孝堦始刊行之年七十餘卒嗣子芑元龍門人王汝玉韞齋寓館徐氏有香溪雜詠三十首

談艾字崇先號芸圃諸生著有楚游草子復字萊逸遊庠後與吳西津沈秋坪諸人切磋爲詩生平恬淡自好不爲翕翕熱詩亦清新俊逸迴絕恆蹊著有爲南齋吟稿范來宗爲之序復子晉昌字鼎鍾嘉慶辛酉舉人同族有耀駿飛及師吉升吉履吉俱工詞藻有耀號桂艇博覽羣編書法擅四體尤喜學二王董香光著有金粟館題跋二卷金粟館文鈔二卷詩稿一卷秋興詩云蠹魚食字神俱化蠹履憐文信有常古壁書繙廿一史中峯帖寫十三行蓋自道其癖嗜也 師吉字伯承號怡泉布衣好學工篆隸善寫生每與小宛磊齋諸名士唱和又仿史記索隱例搜集張守節史記正義補其遺漏彙爲成書師吉物後稿歸洞庭山人王塗家木瀆故家自明初至清談殷二族最繁談居中市殷氏分住瀆

東西故諺有兩首兩黃鸞中央一副玳瑁簪之  
目殷鸞談玳皆同音字也觀此可想見其盛

吳溥字霖施別號西津諸生晚棄舉子業專精史學著有歷代  
人物氏族志及鳴秋草從子荀鶴字藻度號磊齋諸生與沈欽  
韓錢珏號改齋許原號弱庵居石諸人友善有辛夷館詩草妻  
談氏晉昌妹亦工小品詩神韻韶秀與荀鶴集合刻瀆上女子  
能詩自姜貞女後不多見也

王在東字步曾諸生工詩家有環山樓沈歸愚李客山諸先輩  
題詠處也暇日嘗與西津萊逸秋坪諸友集其中擘牋飲酒唱  
和爲歡風雅冠一時著有雲峯詩草同時馬泰始字海樵有叩  
景小草又注陶詩附以王孟韋柳四家名曰風雅匯源稿本李

協思字賡三一字渴羗有晚翠館詩

吳泰來字企晉號竹嶼祖銓吉安太守歸築遂初園於木瀆父  
用儀購書數萬卷藏其中多宋元善本泰來才情明秀日與江  
浙諸名士流連觴詠如是十餘年乾隆庚辰進士三十七年迎  
鑾召試賜內閣中書顧少無宦情壯而彌篤未幾以兄弟析產  
乃售其園畢沅招主關中書院又隨至河南年六十餘卒自定  
其詩爲硯山堂集十卷餘稿藏於家自是後登進士籍者有范  
來宗徐華嶽爲香山人來宗字支山乾隆乙未進士官編修乞  
養歸爲文正義莊主奉重游泮宮年八  
十一有洽園詩稿華嶽字鎮西嘉慶辛酉進士庶常  
改知縣不就職歸以著述自娛有詩故考異三十二卷  
吳恩韶字春甫號訥人嘉慶戊辰進士官刑部員外郎劾奏德

清民案得雪沈寃旣授山西道監察御史吏科給事中丙子典試山左道光丙戌會試同考官所拔皆知名士輿論翕服年六十九卒著有漱石軒稿

黃成字樹穀蕉亭曾孫以元和諸生中嘉慶庚申舉人久佐粵幕復周流楚蜀時稱香涇先生著有南游草其過張丞相祠詩痛憤激昂尤膾炙人口歿後門人汪榮刊行之時又有徐臻字意

園海甯人桑弢甫弟子晚居木瀆蔡光裕芝昀貢生蔡琨芷香諸生工書法余上林陟岷等皆

以幕客知詩名而周珠生兄弟最著

沈欽韓字文起號小宛木瀆人父培宗號秋槎工詩欽韓中嘉慶

丁卯舉人安徽甯國府訓導自幼穎敏而爲學甚勤暑夕苦蚊

置兩足於牀讀書常至漏三下家貧借書於人計日歸輒寫其要遂淹通經史旁及諸子百家古今別集彙集類書雜記其學自詩賦古文詞外尤長於訓詁考證著有兩漢書疏證七十四卷左傳補註十二卷考異十卷三國志補訓故八卷釋地理八卷水經注疏證四十卷又補註韓昌黎集王荊公集范石湖集他若陳祥道禮書王施查三家蘇詩注王昶金石萃編隨手糾謬積成卷帙凡著述幾四五百萬言惟幼學堂詩文集刊行於世道光十一年卒包世臣爲行狀王鏊志墓子箕衍

張茂勳字于常家柳溪諸生錦江子嘉慶戊辰恩科舉人熟于史漢文選詩胎息杜蘇渾灝流轉洪鼎蔣如洵爲其高足弟子

嘗游贛幕江行過大觀亭余忠宣祠題壁未數日皖人繼聲傳誦已滿江城戲作絕句以報之著有石樵詩稿從兄丹字葵園居木瀆喜毛詩音韻之學與同里張邦瑜互相講習邦瑜字朗屏甲子舉人以書名

周珠生字小白曹州太守埜堂佚其名子遷居木瀆少工詩見賞

於杭世駿袁枚以諸生歷佐燕遼秦晉滇黔閩粵諸戎幕南抵直臘緬甸西北出伊犁過巴達入俄羅斯界足跡徧天下時而倚馬草檄時而橫槊賦詩有燕趙感慨之風出塞吟一卷多西域掌故爲徐松志

所未備者尤工篆楷善丹青兼擅騎射錢侍郎榮惜其才許保舉因事中阻東省吉中丞辦白蓮教事延聘上座朝夕參謀頗著勞

績尋歸里年已七十矣著有瓣香閣詩鈔行世兄天生弟嘉生

寶生並工吟咏寶生號晉齋先赴滇中後游幕魯豫補官秦蜀

著有長青閣養雲軒等詩稿天生字健齋有拈花小草嘉生字橫雲有鉢花小草天生子以豐字

少蓮有散花小草熾昌字耕雲有悟花小草詳木瀆詩存及見錄詩話

周敬燮字古愚能詩著有獨言集綵娛閣詞從子孝壘字愚初別號逋梅以諸生入貲爲部主事吳中有諸生獄知名士多逮繫木瀆距城三十里孝壘日懷餅金走繫所相慰勞或行風雨泥淖中衣溼履敝不自息獄久乃已入都分刑部廣西司兼安徽司行走充律例館纂修官以養母乞歸徙居楓橋著還讀廬詩鈔八卷先後輯瀆川耆舊詩集及友朋遺集各十數種鋟板

以行弟孝垓字平叔精學古籍嘗刊毛詩鄭氏箋李鼎祚周易集解號爲善本捐貲五百千創興義學

胡量字眉峯華亭諸生寓吳年十九題詩於虎邱石壁爲朱笥河先生所見招攜入都笥河爲風雅宗天下名流出門下然嘗曰妙才黃仲則奇才胡眉峯王文端劉文清合詞薦修明史未果用已而佩囊韉躍馬從吉林將軍出關暨入都而廷議裁巡臺御史量走告二公曰果爾則臺民必叛卒有林爽文之變畢沅防陝回孫士毅征安南以不用其策而敗晚年流寓揚州酒酣耳熱縱談南北邊形勝阨塞述古人成敗之迹如指掌所爲詩皆奇氣空湧不可控制未幾妻子俱歿益顛躓吳中至木瀆

居義學訓村童數年而卒年七十二包慎伯序其詩

藝舟雙楫

瀆人

周平叔經紀其喪並爲刊海紅堂集行世

韋光黻字君繡長洲諸生顧元熙弟子書法亦酷似其師詩學李長吉怪偉奇特錢唐陳大令文述亟賞之一時名大起中年後出入盛唐名家包慎伯尤所推許有詩六十餘卷舊寓何山之麓顏所居曰在山草堂尤工畫善琴兼通醫理楓橋宋霖周孝堦諸人與往來友喜霖字雪香貢生有孝行以善畫名孝堦從子磬南亦善琴者也

袁仁虎字芸樓諸生負氣節嘉慶初年邑有諸生吳三新負逋被笞案泥首同輩仁虎合三邑諸生自司府抗辨且分走南北



二都上控學使受朦蔽自松江按試還先斥顧莛以下三十餘  
人名籍同知李焜阿大吏旨尤攘臂欲徧傳諸生于獄會兩欽  
差至錢樾玉德得雪官吏俱被黜莛等得解而僅譴仁虎及馬照王  
元辰三人仁虎謫配揚州數月始歸仁和錢東作畫史以送其  
行沈欽韓書後諸名士皆有題詠時蔡牽擾海劫掠乍浦銅局船損  
失巨萬仁虎以奇策脫里人徐菊莊於厄並返其舟以是益稔  
其才後更爲醫士以終嗣孫啓潮字子辛工人物山水花卉爲  
時所重

徐維撰字栗庵洞庭西山人遷居木瀆廩貢生昆季八人析產  
時推肥取瘠倡立義莊以瞻族晚年出族親借券悉焚之曰勿

留此爲他人累道光元年薦孝廉方正辭之著有三禮類纂介  
祉堂筆記卒年八十一同族宗暘字曰谷歲貢生有紅芍藥齋

吟稿潘相國芝軒爲之序維撰子元蓉硯冊 杲墨卿 諸孫雲藻庾樓 彥

英詠之 士偉藕齡 曾孫誦芬賦秋 並諸生工詩元蓉有小海棠巢文集玉台仙館詩

鈔彥英工詩古文詞兼精畫理士偉精篆刻有花嶼吟草誦芬有賦秋聲館詩集 翱子毓駿適聲 從子錫

麟心 光緒丙子己丑兩科舉人

錢炎字杏圃木瀆人家故殷富好讀書不樂仕進與弟照煦俱  
以能詩名道光元年徵舉孝廉方正辭不就試士論高之有別  
業在斜橋西名曰潛園照字端溪有端園在山塘煦字子舟亦  
得薛氏廢園而葺之名曰息園云

汪正字石心先世自歛遷長洲正生四月而孤事母孝母病剖股和藥以進後居木瀆生平無所嗜好獨孳孳爲善其爲善或師古或由舊或出新意度理揆情無微不至道光壬辰癸卯甲辰咸豐壬子鎮江江甯徐州水災正集貲往賑丁卯河南大饑釀貲遠赴設粥收養婦孺二千餘人庚申粵賊破長興殺人無算正往掩埋四月郡城不守挈家避太湖之衝山山之人素德正至則爭相迎致正安之戚友來投者罔弗納寒者衣病者藥亡者爲棺座雖在流離轉徙中而樂施之心自若也同治癸亥年卒年六十有一嘗編木瀆詩存十四卷木瀆文徵八卷采集至百五十人之多亦文獻淵藪也同治十年以孝子旌顧廣譽

爲作傳

光緒間里人惠善植亦以豪爽聞樂善好施無所不至蓋繼石心而起者

周信昭字賦琴木瀆人國學生志意忼慨不樂爲媿媿之行著

有秋水齋集成豐庚申三月粵匪將逼蘇州各處練鄉團禦賊

香山徐則

新畬諸生

橫金錢家昌

爾庚監生

等尤激昂奮發與木瀆互爲

聲援時信昭司瀆中團練事四月十三日郡城陷團勇星散信昭不得已退避柴場村冀復集散卒越數日遇賊脅降不屈賊怒甚裸而縛諸樹支解之其姪之鳳剖腹死廿八日賊至西跨塘廩生江廷璐郡人就館於此率鄉團前驅死之五月九日羣賊擾木瀆諸生蔡振銘被害王家橋西同日錢家昌徐時鑄張心梅等拒賊吳山嶺死節惟則等恃其勇猶乘間逐賊木瀆及堯峯山

下賊頗憚之七月中午夜連舟至近郭乘不備掠賊館八月三十日賊大至焚胥口掠下場則等拒之於津橋有賊舟繞湖而西登岸呼噪鄉兵皆潰同死者四百餘人今津橋畔有勇義祠卽祀諸義士者又有陳仁爵范雲達顧金如等皆先後殉難或已報未報要皆志節之士也而烈婦如賈邦畿妻陳氏朱蓉庭妻諸葛氏等又不記其數

蔡始權字秋帆木瀆人太學生官廣東潮陽縣縣丞調署饒平縣借補連平州長吉巡檢咸豐庚申四月江西新豐逆賊竄惠韶二郡大吏檄官軍奮擊同知文星瑞都司卓興等連擊敗之始權在汛帶勇禦賊力戰陣亡事聞優卹詔祀該地方昭忠祠旋以喪歸里族子振銘字湘浦諸生少耽吟詠工書法操行方正

正己習申韓學就靖江縣幕務申冤滯歸鄉教授喜與人談忠孝事是年五月髮逆擾木瀆振銘遇賊王家橋被執痛罵不屈死二人先後俱旌忠義卹武德騎尉並贈雲騎尉世識入祀長元吳三邑昭忠祠

沈淵字少愚家皋峯山麓祖振二泉父鯤南洲俱布衣能詩與同里

金啓鵬張紹松輩往還唱和淵性純孝母先歿父病刲股和藥以進及終哀毀盡禮時祖母年已九十餘奉養益謹詩宗盛唐多感慨悲涼之作精醫術貧病不取酬邀之卽往同治十年以孝行旌子穀諸生能傳其家學紹松字嘯泉官瀆人晚寓胥口著有話雨

山房詩

金蘭字子春自號碧螺山人父啓鵬

字萬里

工詩有葑溪草堂集

蘭幼承家學究心經傳力闢釋老神鬼諸不經之說多所論辨  
清明山有淫祠作威福愚民爭趨之蘭言之縣令遂置僧於法  
而毀其廟自是淫祀少衰濱湖多風浪損害田廬出已資在胥  
口南累石植蘆以禦之鄉里賴焉馮桂芬修郡志屬爲採訪多  
所增益光緒初元舉孝廉方正未幾卒有碧螺山館詩鈔行世  
王炳燮字樸臣元和諸生喜儒先性理及一切經世之學事母  
單極孝粵匪方熾遷居木瀆與金蘭沈淵輩結碧螺吟社自號  
胥山瘦人賊平還郡領同治甲子鄉薦馮中允議減賦炳燮與  
有力焉其上李撫軍狀論省城善後事宜上曾侯相書論外交  
文集行世

換約事深識遠慮洞若蒼蔡辛未補知縣李公留辦賑濟及北  
河工程光緒丙子進士官邯鄲知縣有政聲卒著有毋自欺室  
文集行世

馮芳緝字申之桂芬長子其治戊辰進士桂芬修府志未竟歿  
芳緝與同人足成而刊行之官刑部郎中監察御史記名海關  
道以廉平著歿於京邸弟芳植字培之甲子舉人光緒間署江  
西饒州知府既歸在里中創設保節局立義塾以惠孤寡尤好  
結納有原嘗之風

顧肇熙字緝庭晚號退廬郡人通政南雅族孫也同治甲子舉  
人累官吉林分巡道陝西鳳邠鹽法道福建臺灣道分省後兼

署藩篆致仕歸居木瀆優游林泉詩具體北宋書法宗眉山歲甲辰就里中創辦小學堂獨開風氣之先捐巨費不貲陳中丞夔龍蒞視稱善年七十餘考終里第士論咸惜之

柳商賢字質卿橫金西塘人同治庚午舉人與修府志爲馮中允弟子光緒間官浙江甯海縣歸後購得木瀆遂初園居之未幾卒著有蘧庵詩文鈔其後葉學使昌熾自隴省歸亦賃居是宅數年采訪遺文刊訂語石柳葉皆馮公高弟博學洽聞爲後進領袖者也

朱振聲字玉森木瀆人父選工書善鑒賞尤精醫術振聲能世其學爲人寡笑言取與不苟以諸生佐粵大吏幕歲杪釀金將

寄家適某友有喪告貸竟與之而不問家事有嗜石癖及歸貯兩小篋甚重人方注視之不知其皆硜硜物也所爲詩清新綿麗其夢餘詩草從子錦綬字建侯光緒壬寅舉人同時戴姜福綬之以神童著爲黃學使體芳極賞九歲入泮旋補廩舉優聲望爛然後亦中壬寅鄉薦官四川知縣其祖木瀆乃父始徙居陳墓者也

王鳳藻字雨時木瀆人博聞多識工書法篆隸尤精早歲得泮元與同里吳錫熊子祥顧緝熙廣萱最善文明亦俱噪一時光緒甲午舉人繼以酒疾終錫熊恩貢緝熙歲貢又有張紹渠字季若癸巳恩科舉人陶貽勛字少農壬寅科副貢皆少年英雋惜早卒